

- हिन्दी दिवस रे मौके आज देश-प्रदेश मांय कार्यक्रम राख्यी ज्या- गृहमंत्री अमित शाह देश रो एको बणायो राखण मांय हिन्दी रा काम ने खास बतायो ।
- प्रदेश रा मेडिकल कॉलेजां मांय अब पढाई हिन्दी मांय ई व्हे सकेला -जोधपुर अर बाड़मेर मेडिकल कॉलेज मांय हिन्दी मांय पढाई रो सुबीतो सरू व्हयो ।
- राईजिंग राजस्थान इन्वेस्टमेंट समिट सारू जापान अर दक्षिण कोरिया रा दौरा पाछे मुख्यमंत्री भजनलाल शर्मा जयपुर आया-कह्यो के दोन्यू देशां मांय चोखो समर्थन मिल्यो ।
- प्रदेश मांय बारिश रो दौर मंदो पड्यो- ऊगणी हलका मांय केई नीचला हलकां मांय हाल ई पाणी भर्यो है ।

000

आज हिन्दी दिवस है। साल 1949 मांय आज ही रा दिन संविधान सभा देवनागरी लिपि मांय हिन्दी ने राजभाषा रा तौर ऊं स्वीकार कीनी ही। ई मौके नई दिल्ली मांय राजभाषा हीरक जयंती समारोह अर चौथो अखिल भारतीय राजभाषा सम्मेलन राख्यी ज्यो। ई मौके गृहमंत्री अमित शाह कह्यो के हिंदी भाषा देश ने एक राखण मांय खास काम कीनी है। वे कह्यो के नुवी राष्ट्रीय शिक्षा नीति मांय बच्चों ने मायड़ भाषा मांय सिखावण माथे जोर दियो ज्यो है।

हिन्दी दिवस रे मौके प्रदेश मांय ई न्यारी-न्यारी ठौड़ां कार्यक्रम राख्यी ज्या। ई मौके भाषा अर पुस्तकालय विभाग री ओर ऊं राज्य स्तर रो कार्यक्रम जयपुर रा सवाई मानसिंह मेडिकल कॉलेज मांय राख्यी ज्यो। ई मौके उप मुख्यमंत्री दिया कुमारी लेखन री दस विधावां मांय हिन्दी सेवा पुरस्कार दीना। वे कह्यो के हिन्दी केवल भाषा या विषय नी है, बल्कि म्हाणी ओळखाण है। दिया कुमारी नौजवानां ऊं सोशल मीडिया माथे ई हिन्दी ने बधावो देवण री अपील कीनी।

कार्यक्रम मांय सामाजिक न्याय अर अधिकारिता मंत्री अविनाश गहलोत कह्यो के हिन्दी केवल भाषा नी है बल्कि म्हाणी संस्कृति री धरोहर है। ई मौके कार्मिक विभाग रा शासन सचिव डॉ. के. के. पाठक कह्यो के भाषा एक बहाव है जो संस्कृति ऊं संस्कार ले र आवे है। ई मौके हिन्दी रा लेखकां अर राजस्थान बोर्ड री दसवीं अर बारहवीं री परीक्षा मांय हिन्दी मांय सौ फीसदी नम्बर लावण वाळा विद्यार्थियां रो मान करी ज्यो। कार्यक्रम मांय विधायक गोपाल शर्मा ई मौजूद रह्या। केन्द्र अर राज्य सरकार रा न्यारा-न्यारा दफतरां मांय आज हिन्दी पखवाड़ो सरू व्हयो। जयपुर रा अल्बर्ट हॉल मांय निबंध लेखन अर श्रुत लेख री होड़ां राख्यी ज्यी। बाड़मेर ज़िला री स्कूलां मांय निबंध लेखन, श्रुत लेख अर हस्त लेखन समेत न्यारी-न्यारी होड़ां राख्यी ज्यी। केकड़ी री न्यारी-न्यारी स्कूलां मांय ई निबंध लेखन, कविता पाठ अर भाषण री होड़ां राख्यी ज्यी अर जीतण वाळा विद्यार्थियां ने ईनाम दिया ज्या। केकड़ी रा सरकारी कॉलेज मांय **"वर्तमान परिप्रेक्ष्य में हिंदी भाषा का महत्व"** मुद्दा माथे निबंध होड़ राख्यी ज्यी। टोंक मांय विचार गोष्ठी अर निबन्ध लेखन समेत न्यारी-न्यारी होड़ां राख्यी ज्यी।

सवाईमाधोपुर जिला मांय राख्यी ज्यी संगोष्ठियां मांय हिंदी ने बत्ती ऊं बत्ती काम लेवण माथे जोर दियो ज्यो। कोटपूतली-बहरोड़ रा लाल बहादुर शास्त्री राजकीय महाविद्यालय मांय सप्ताह भर चालण वाळा कार्यक्रमों री सरूआत करीजी। सांचौर रा स्कूल-कॉलेजां मांय कार्यशाला राख्यी ज्यी अर कविता, नाटक अर निबंध री होड़ां राख्यी ज्यी। झालावाड़ री भवानी नाट्यशाला मांय विचार गोष्ठी राख्यी ज्यी। डूंगरपुर मांय **राष्ट्र भाषा हिन्दी के संरक्षण एवं संवर्धन में पत्रकारों की भूमिका** मुद्दा माथे विचार गोष्ठी राख्यी ज्यी। भरतपुर रा सरसों अनुसंधान निदेशालय मांय हिंदी पखवाड़ो सरू करी ज्यो। चूरू मांय खास कार्यक्रम राख्यी ज्यो। हनुमानगढ़ जिला रा स्कूल-कॉलेजां मांय ई विश्व हिंदी दिवस मनायी ज्यो।

000

प्रदेश रा मेडिकल कॉलेजां मांय अब हिन्दी मांय ई पढाई करायी जावेला। चिकित्सा शिक्षा विभाग आज हिंदी दिवस रे मौके हिंदी माध्यम मांय डॉक्टर री भणाई सरू करण री अधिसूचना जारी कर दीनी है। चिकित्सा शिक्षा विभाग री प्रमुख शासन सचिव गायत्री राठौड़ आ जाणकारी दीनी। वे बतायो के मारवाड़ मेडिकल यूनिवर्सिटी ऊं जुड़्या डॉ. सम्पूर्णानंद मेडिकल कॉलेज, जोधपुर अर बाड़मेर मेडिकल कॉलेज मांय ओ सुबीतो मुहैया करा दियो ज्यो है। आं दोन्यू मेडिकल कॉलेजां मांय सत्र 2024-25 मांय दाखिलो लेवण वाळां विद्यार्थियां ने हिन्दी या अंग्रेजी मांय भणाई रो विकल्प दियो जावेला। चिकित्सा शिक्षा आयुक्त इकबाल खान बतायो के दूजा मेडिकल कॉलेजां मांय ई बेगो ई ओ सुबीतो मुहैया करावण री कोशिश करी जावेला।

000

रामगढ़ रा विधायक अर कांग्रेस रा आला नेता जुबेर खान ने आज सुपुर्द-ए-खाक कर दिया ज्या। वां रो आज निधन व्हे ग्यो हो। वे कुछ दिनां ऊं मांदा व्हे रह्या हा। जुबैर खान पहली दफा साल 1990 मांय रामगढ़ ऊं विधायक चुण्यी ज्या हा। राज्यपाल हरिभाऊ बागड़े, मुख्यमंत्री भजनलाल शर्मा अर पैली वाळा मुख्यमंत्री अशोक गहलोत अर पैली वाळा उप मुख्यमंत्री सचिन पायलेट जुबेर खान री मौत माथे शोक जतायो है।

000

राईजिंग राजस्थान इन्वेस्टमेंट समिट सारु निवेश लावण रा मकसद ऊं जापान अर दक्षिण कोरिया रो दौरा कर र मुख्यमंत्री भजनलाल शर्मा, उपमुख्यमंत्री प्रेमचंद बैरवा अर प्रतिनिधि मण्डल रा दूजा सदस्य आज जयपुर पाछा आ गया। जयपुर पूग्यां पाछे मुख्यमंत्री हवाई अड्डा ऊं खुली मोटरगाडी मांय भारतीय जनता पार्टी रा दफतर पूग्या, जठे राख्यी ज्या कार्यक्रम मांय मोटी तादाद मांय भाजपा रा कार्यकर्ता वां रो स्वागत कीनो। ई मौके मुख्यमंत्री कह्यो के वां रा राज मांय प्रदेश रा विकास सारु केई खास जतन करी ज्या है। वे कह्यो के जापान अर दक्षिण कोरिया ऊं चोखो निवेश मिलण री आस है। मुख्यमंत्री कह्यो के प्रदेश मांय निवेश सारु उमाव निजर आ रह्यो है।

-----

000

प्रदेश मांय बिरखा रो दौर मंदो पड़ ग्यो है। सब ऊं बत्ती 32 मिलीमीटर बारिश धौलपुर जिला रा सैपऊ मांय दर्ज करी ज्यी। केई ठौड़ां हल्की बारिश व्ही। जिला मांय हाल ई चम्बल नदी खतरा रा निशाण ऊं ऊंची बह रही है। पार्वती नदी मांय पाणी रा उफाण रे कारण केई गांवां मांय हाल ई हालात नी सुधर्या है अर जिला मुख्यालय माथे फौज री टुकडी तैनात है। बाड़ी कस्बा रो सम्पर्क हाल ई धौलपुर अर बसेडी ऊं कट्योडो है। जिला प्रशासन घणी बिरखा वाळा हलकां मांय नुकसाण री ठा करण सारु सर्वे सरु कर दीनो है। सवाईमाधोपुर मांय दो दिन ऊं बिरखा नी व्हेवण ऊं अब हालात सुधरण लाग्या है।

-----

मौसम विभाग बीकानेर संभाग रे अलावा बाकी संभागां मांय 18 सितम्बर तांई कठे-कठे बिरखा रा आसार जताया है।

000

प्रदेश मांय आज जलझूलनी ग्यारस रे मौके भरयोडां जलाशयां माथे “राजस्थान जल महोत्सव 2024” राख्यी ज्यो। कोटा रा किशोर सागर तळाव माथे राख्यी ज्या कार्यक्रम मांय लोकसभा अध्यक्ष ओम बिरला कह्यो के पाणी कुदरत री अनमोल निधि है, जिण ने समझदारी ऊं काम लेवण घणो जरुरी है।

कार्यक्रम मांय कोटा दक्षिण रा विधायक संदीप शर्मा जल पूजन कीनो। संभागीय आयुक्त उर्मिला राजोरिया मौजूद लोगां ने पाणी बचावण अर इण ने समझदारी ऊं काम लेवण री शपथ दिरायी। झालावाड़ मांय जिला स्तर रो कार्यक्रम झालरापाटन रा गोमती सागर तळाव माथे राख्यी ज्यो। ई मौके झालावाड री जिला प्रमुख प्रेम बाई दांगी अर जिला कलेक्टर अजय सिंह राठौड़ ई मौजूद रह्या। कार्यक्रम मांय साफ-सफाई राखण अर पाणी बचावण री शपथ दिरायी ज्यी। भीलवाडा मांय मांडल रा तळाव परां राख्यी ज्या कार्यक्रम मांय सांसद दामोदर अग्रवाल ई शामिल व्ह्या। मेजा बांध माथे राख्यी ज्या जिला स्तर रा कार्यक्रम मांय जिला कलेक्टर नमित मेहता पूजा-अर्चना कीनी। अजमेर री फायसागर झील री पाल माथे राख्यी ज्या कार्यक्रम मांय लोग पाणी बचावण रो संकल्प लीनो। सवाईमाधोपुर रा मानसरोवर बंधा माथे राख्यी ज्या जल महोत्सव मांय जिला कलेक्टर डॉ. खुशाल यादव पाणी ने सोच समझ र काम लेवण अर सामुदायिक स्तर माथे पाणत करण अर ट्यूब वेल रीचार्ज सरीखा कार्यक्रम राखण री जरुरत बतायी।

000